

Papru

JIRIMIÚÑKAN

papí áatramu

Papru Jirimiúñkan papin áatramiania nu

¹Wi Papru ju papin áaran akuptajme ámin, Jirimiúñká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame ijíjái tsanínkia takáa asakmin ju papin akuptajme. ²Núnisan ame jeemiin Yus-shuar irunainia nunasha tura ii umaí Apiancha tura Arkípiuncha ijíjái ti kakaram takasu asamtai ju papin akuptajrume. ³Yus ii Aparí tura ii Uuntrí Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiúñ pénker Yus-shuar ámiayi

⁴⁻⁵Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúmínkíajai. ⁶Áujeakun chíkich shuarsha ámijíjái métek Yúsan nekas enentáimtuiniak ashí pénker ana nuna ti paant nekaawarat tusan seajai. Ashí pénker ana nuka Jesukrístu shiir awajsamujái takakji. ⁷Wisha ame anenkratmajái ti shiir enentáimtakun waraajai. Yatsurú, ámijíjái ashí Yus-shuarsha shiir enentáimiainiawai.

Papru Unisemun waitnentratniun Jirimiúñkan seamiani nu

⁸Nu asamtai kakaram tátsujme. Kame wakeraknaka Kristu akatramu asan “Ju túrata” tíminiatjijame. ⁹Antsu aneakun aya júnisan tájame. Wi Papru úuntach asan tura Krístun takarkun sepunam pujakun ¹⁰Unisemu waitnentraí tusan seajme. Niisha wi ujakmajái Yus-shuar ajasu asa winia uchirua áintsan ketete. Sepunam pujayatan ni aparíya áintsanak ajasjai.

¹¹Nuikkia Unisemu ántrauyi antsu yamaikia aminiisha winiisha yáimniuiti. ¹²Ataksha awantajme. Wi ti penker aneamu asamtai pénker

itiaata. ¹³Wi Yus-Chichaman étserkun sepunam pujajai. Túmakun ame yajá pujakum yáintkiatin tujintiakmin nii antsu wijíají pujus yáintkiat tusan wakerimjai. ¹⁴Túrasha ámin ujatsuk túrachmin enentáimpranjai. Kame ame wakerakum útsukchamujai “pujustí” tákumnin̄kia maak. ¹⁵Júnisssha enentáimpramniaiti. Unisemu ishichik tsawant men̄kakamai tura yamaikia waketki ámijíají tuke pujustatui. ¹⁶Kame yamaikia emetachma antsu ame aneamu yátsumea áinis átatui. Nuka ti pen̄kerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷Wisha ti pen̄ker amikrumchakaitiaj. Tuma asam winia itiaarua nútiksam shiir awayáta. ¹⁸Yajauch awajtamkaitkiuin̄kia tura ámijíají tumashitkiuisha wi akiktatjai. ¹⁹Wi Papru nekas winia uwejruijái juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum. ²⁰Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikrurta.

²¹Ti pen̄ker uminiaitme nuna nékakun júnisan áatjame. Tura wi seajmena nuna nan̄kaamas túrattamna nuna nékajai. ²²Ayu. Átum Yus áujturkurmin Yus winia tsan̄katruktatui atumiin̄ iiraitniun. Tuma asamtai wi nuí jean pujustin iwiarturata.

Amikmaamiania nu

²³Épaprassha niisha Jesukrístunu étseruk sepunam wijíají pujus amikmaatmarme. ²⁴Núnisan̄ Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵Ii Uuntrī Jesukrístu atumniasha ti shiir yainmakarti. Nuke atí.